

Finamiras e svilup dallas partidas grischunas

En sia novissima publicaziun s'occupa il historicher Adolf Collenberg cul svilup mumentau dallas partidas grischunas denter 1880 e 1939. In excuors special ei dedicaus alla legendara «lavina nera». La vernissascha dil cudisch «Die Bündner Parteien auf der Suche nach Identität und Macht 1880-1939» ha giu liug dacuort a Cuera (tudestg) ed a Vella (romontsch).

MARTIN CABALZAR/FMR

En sia publicaziun presenta *Adolf Collenberg* ils resultats da sia perscrutaziun intensiva davart posiziuns e strategias dallas elites politicas dil Grischun el spazi da pressapauc 60 onns. Sco fontaunas primaras ha igl autur consultau cunzun las gasettas che stevan cumpleinamein en survetsch dallas dinastias politicas e dil clerus. A moda concentrada, en in lungatg pointau ed a moda divertenta resda igl autur d'origins e svilups e da victorias e terradas dallas singulas gruppaziuns e da lur exponents. El identifichescha dissidents e convertits che midan magari camischa per pura opportunitad politica e cugl intent da salvar ni acquistar prestige e pussonza.

Stigmatizaziun ed exclusiun dils dissidents

Igl autur cumprova era che la politica grischuna ei stada caracterisada stediamein dalla stigmatizaziun, marginalisaziun ed exclusiun dils dissidents. Seigi quei ils liberals-catolics, ils reformai-catolics, ils socialistis, ils democrats ed era ils cristiansocials. Malgrad che liberals e conservativs eran ideologicamein tgaun e gat, senuspevan els buca da s'alliar tier elecziuns, per aschia mantener lur pussonza e tener l'opposiziun ord igl ogn. Suenter 1920 – cun l'introducziun dil proporz – han las duas partidas etablidas dils conservativs e liberals, survegniu ferma concorrenza. Els ein stai sfurzai da parter la petta sin quater. Quei ha pretendiu da gizzar igl agen profil, da sefocussar sigl essenzial ed accentuar las differenzas, per aschia saver mobilisar meglier igl electorat. Ord quella situaziun da concorrenza ei naschida la «lavina nera».

Quei monolit conservativ catolic che vegneva tgraus e purtaus cumineivlamein da politica, pressa e clerus ha lu era saviu registrar decennis alla liunga splendids success. Ludaus dils «nos» e sbittaus e temius dils auters. En quei cumbat virulent eran ins nuota maufers da denigrar e columniar in l'auter cun blasfemias ed aviras sco «radicaluns senza religiu», «scavs da pres e paders»,

Adolf Collenberg identifichescha dissidents e convertits che midan magari camischa per pura opportunitad politica e cugl intent da salvar ni acquistar prestige e pussonza.

«maglia catolics», «framassuns», «comunists e socialistis», «traditurs e trabants», per numnar mo entginas. En quei grau eran las anteriuras gasettas da partida en scadin cass in bionton pli aggressivas e polemicas che las gasettas da forum dils davos decennis.

Cumbat denter liberals e conservativs

Il 19avel tschentener ei staus signaus essenzialmeins dil cumbat denter liberals e conservativs. Ils dus moviments eran denton aunc buca organisai en partidas politicas cun structuradas democraticas sco ozilgi. Entgens paucs giurists e gasettists cumandavan las fiastas e dictavan al pievel co el hagi da votar ed ele-



Il historicher Adolf Collenberg (dretg) ed Oscar Eckhardt digl Institut per la perscrutaziun dalla historia grischuna a caschun dalla presentaziun da la nova publicaziun.

ger. En Surselva battevan conservativs e liberals, independentamein da lur derivonza confessiunala, in encunter l'auter. Publicisticamein disponevan ils conservativs dalla Gasetta Romontscha, fundada e redigida da Placi Condrau e ses successurs, ils liberals entuorn ils Latour da Breil, ils Steinhauer da Sagogn ed Arpagaus da Cumbel, susteni d'intellectuals romontschs a Cuera han ediu p.ex. las gasettas «il Grischun» e «La Ligia Grischuna».

Ferton ch'ils conservativs fagevan tut il pusseivel per tener il cantun naven dalla scola populara ed impedir scolas medias confessiunalmeyn mischedadas, vulevan ils liberals scolas statalas independentas dalla baselgia. Tenor Collenberg seconcentravan ils conser-

electoral: mintgamai treis liberals e dus conservativs en regenza e Cussegl nazional. Malgrad las considerablas differenzas ideologicas ha quei patg funcziunau entochen 1919.

Caspar Decurtins eliminenscha ils liberals-catolics

Suenter 1880 eis ei reussiu a Caspar Decurtins, cun vigurus support ecclesiastic, d'eliminar ils liberals-catolics. Quei malgrad ses stretgs ligioms famigliars cun ils Latour e Steinhauer. Duront passa 20 onns ha il «liun da Trun» allura dominau e dictau la politica conservativa. Sco giuvenot eis el s'engaschaus da camifo per mantener la claustra da Mustér e la scola claustrala. El decuors dil temps semarmenescha Decurtins denton dil «politicher social» ad in «politicher ultramontan» d'observanza papala e da tenuta extrem federalistica. En quei grau relativescha e curregia Adolf Collenberg empau la glorificaziun da Decurtins cuntenuida ella biografia posteriura da Carli Fry. El el constatescha: «Siu tgau dir e sia demananza dictatorica han la finala terminau alla sava dil 20avel tschentener influenza e carriera politica da Decurtins.» Trumpaus hagi Decurtins viult il dies alla politica, sorprendend 1905 ina professura alla Universitad catolica da Friburg, dalla quala Decurtins ei staus confundatur. Era sche sia rolla politica ei ella retrospectiva bufatgamein ambivalenta, tonpli indispetiveils restan ses merets culturhistorics sco editur dalla Crestomazia Retoromontscha.

Sco cunterpeisa alla politica propagada da Decurtins vegn fundau 1903 la partida conservativa. Denter ils iniziants sesanflan il colonel Christian Solèr da Vrin, il giurist Alois Steinhauer da Sagogn ed il miedi Giachen Michel Nay da Trun.

Pei a pei vegnan era ulteriuras partidas fundadas: 1906 ils socialistis, 1918 ils cristiansocials e 1919 ils democrats. L'introducziun dil proporz ha la finala midau fundamentalmeins la politica dallas partidas. Era purs e luvvers sereghelian e pretendan ina representanza commensurada. Sco representants purils portan ils conservativs Christian Foppa da Vignogn, ils democrats Andreas Gadiant da Serneus ed ils socialistis Gaudenz Canova da Domat.

La Lavina nera

L'introducziun dil proporz ha muntau la fin dalla veglia formula magica. La petta electorala stueva uss vegnir repar-

La lavina nera hagi preservau il pievel catolic da scadina influenza d'ordeifer e mess quel en retschas serradas sco schuldada che marschava sin commando, manegia Collenberg.

tida sin quater partidas enstagl mo sin duas. Ils purs liberals ei i en roschas vi tiels democrats, ils conservativs han piars ils reformai ed ils luvvers (Grütli-ners) ein simpatisau culs socialistis. Quei ha sfurzau da gizzar il profil e focussar las prioritads. Ils conservativs, cun vigurus sustegn da pressa e scantschala, ein sefocussai silla religiu sco tezla d'identificaziun e cumbat. «Far da catolic e dar la vusch a democrats e socialistis, gliez mondi buc e periclitesci il salid dalla olma, era il motto» scriva Collenberg. Il cumbat denter las partidas ei staus ordvart hanaus, ordlunder ei seresultau in cumbat cultural tardiv. Ferton ch'ils conservativs ein denton vegni da serrar las retschas ed augmentar lur pussonza, ei la partida liberala vegnida splimada da camifo cunzun dils democrats.

Lur forza e vigur politica dils conservativs ei d'attribuir cunzun alla cooperaziun intensiva da politica, pressa e clerus. Ils exponents principals ein stai duront passa 120 onns la dinastia Condrau culs exponents da treis generaziuns: Placi, Giachen Giusep e Giusep (dr. Sep). Decisivs pil success ei denton era il support ecclesiastic staus: cunzun entras pader Maurus Carnot (cun sia affinitad per la casa imperiala austriaca) e

canoni Carli Fry (cun sia admiraziun pil faschissem talian).

Sco Collenberg constatescha consisteva la prestaziun sociala dalla lavina nera cunzun «sin administrar la libra paupradad, la humilitonza ed oravontut la schientscha dil puccau». La lavina nera hagi preservau il pievel catolic da scadina influenza d'ordeifer e mess quel en retschas serradas sco schuldada che marschava sin commando, manegia Collenberg. Alternativas tier quei catolicissem politic devi ei strusch, dissidents vegnevien difamai, isolai ni tarmess da Porclas ora ni da Cuncclas oragiu.

Continuaziun sco grond desiderat

Era sch'ins vegn buca exnum adina allas medemas conclusiuns sco Adolf Collenberg partenent il svilup dallas partidas el Grischun, eis ei tonaton ina lectura informativa, fascinonta e divertenta cumprovada cun fatgs e fontaunas autenticas. Igl ei tut auter ch'in schetg cudisch sicientific, anzi ina lectura cun la tensiun d'in roman criminal. Sias retscheras calan denton cugl onn 1939. Da beneventar fuss ina continuaziun che analisass ord distanza duida igl andament dallas partidas grischunas dils davos 80 onns. Ton ei cert. Ina tala analiza fuss buca meins interessanta sch'ins considerescha la decumposiziun successiva dalla Lavina nera, l'incorporaziun dils democrats ella Partida populara svizra, la fundaziun dalla Partida cristiansociala e sia sperta fin, la separaziun dalla Partida burghes democratica dalla PPS e buca il davos la recenta fusiun da PCD e PBD tier l'Alleanza dil Cen-

ter. Buca mo sin plaun politic, anzi era sin plaun economic, social, cultural, literar, schurnalistic ed ecclesiastic ha ei dau midadas radicalas e remarcablas el decuors dils davos miez tschentener.

Adolf Collenberg. Die Bündner Parteien auf der Suche nach Identität und Macht 1880-1939. Institut für Kulturforschung Graubünden. Samedia. 288 paginas.



Il frontispezi dil niev cudisch dad Adolf Collenberg. FOTOS MARTIN CABALZAR